

18 սեպտեմբերի 1998 թվական թիվ 568
«ՀԱՅՈՒՍՏԱՆԻ ՓԱՎՈՒՆԱԿԱՆ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ
ԳՈՐԾՈՒՆԵՈՒԹՅՈՒՆՆ ԱՊԱՀՈՎՈՂ ԱՌԱՋՆԱՀԵՐԹ ՄԻՋՈՑԱՌՈՒՄՆԵՐԻ
ՄԱՍԻՆ

Ելնելով «Պետական գույքի մասնավորեցման (սեփականաշնորհման) մասին»
Հայաստանի Հանրապետության օրենքի 6, 18, 19 եւ 24 հոդվածներից, Հայաստանի
Հանրապետության կառավարության 1993 թվականի ապրիլի 30-ի «Հայաստանի
Հանրապետության գազատրանսպորտային համակարգի հիմնական միջոցները
«ՀայՌուսգազարդ» փակ բաժնետիրական ընկերությանը հանձնելու մասին» թիվ 259
որոշումից՝ Հայաստանի Հանրապետության կառավարությունը որոշում է.

1. Հիմք ընդունել «ՀայՌուսգազարդ» փակ բաժնետիրական ընկերության
հիմնադիրներ Հայաստանի Հանրապետության էներգետիկայի նախարարության,
«Գազպրոմ» ռուսաստանյան բաժնետիրական ընկերության եւ «Իտերա» միջազգային
էներգետիկական կորպորացիայի միջեւ 1998 թվականի հուլիսի 2-ին կնքված
Հայաստանի Հանրապետության գազատրանսպորտային համակարգը հայ-ռուսական
«ՀայՌուսգազարդ» փակ բաժնետիրական ընկերությանը որպես սեփականություն
փոխանցելու եւ դրա վճարման պայմանների մասին համաձայնագիրը (կցվում է):

2. Հիմք ընդունելով «ՀայՌուսգազարդ» փակ բաժնետիրական ընկերության
հիմնադիրներ Հայաստանի Հանրապետության էներգետիկայի նախարարության,
«Գազպրոմ» ռուսաստանյան բաժնետիրական ընկերության եւ «Իտերա» միջազգային
էներգետիկական կորպորացիայի միջեւ 1998 թվականի օգոստոսի 12-ին կնքված
Հայաստանի Հանրապետության գազասպառողներին 1998-2001 թվականներին
բնական գազի առաքման եւ դրա ծավալների մասին համաձայնագիրը (կցվում է):

3. «Հայգազ», «Հայտրանսգազ», «Երեւանգազ», «Գազավտոտրանսպորտային»,
«Ստորգետնյա մետաղաշտպանություն», «Տրանսգազչին», «Հայգազչին»,
«Արմավիրգազմեքենա», «Նյութատեխնիկական մատակարարում եւ
կոմպլեկտավորում», «Շինանյութերի արտադրություն եւ շինարարական
աշխատանքներ», «Գազկապչին» պետական փակ բաժնետիրական
ընկերությունները միացման միջոցով վերակազմավորել «Հայգազարդ» պետական
փակ բաժնետիրական ընկերության՝ «Բաժնետիրական ընկերությունների մասին»
Հայաստանի Հանրապետության օրենքի 20 եւ 24 հոդվածներին համապատասխան:

4. Սույն որոշման 3-րդ կետի կատարման հետ կապված՝ «Բաժնետիրական
ընկերությունների մասին» Հայաստանի Հանրապետության օրենքի 8 հոդվածի 5-րդ
կետով սահմանված լիազորությունները վերապահել Հայաստանի Հանրապետության
էներգետիկայի նախարարությանը:

5. Հայաստանի Հանրապետության էներգետիկայի նախարարությանը՝

ա) (5-րդ կետի ա ենթակետն ուժը կորցրել է 16.10.03 թիվ 1337-Ա որոշում)

բ) ապահովել «Հայգազարդ» պետական փակ բաժնետիրական ընկերության կողմից
270 մլն ԱՄՆ-ի դոլար արժեք ունեցող՝ Հայաստանի Հանրապետության

գազատրանսպորտային համակարգի ներդրումը «ՀայՌուսգազարդ» փակ բաժնետիրական ընկերության մեջ՝ վերջինիս կանոնադրական հիմնադրամն ավելացնելու համար:

6. Սահմանել, որ «ՀայՌուսգազարդ» փակ բաժնետիրական ընկերության կանոնադրական հիմնադրամն ավելացնելու նպատակով Հայաստանի Հանրապետության կողմից «Գազպրոմ» ռուսաստանյան բաժնետիրական ընկերության եւ «Իտերա» միջազգային էներգետիկական կորպորացիայի փոխարեն Հայաստանի Հանրապետության գազատրանսպորտային համակարգի 148,5 մլն ԱՄՆ-ի դոլար արժեքով գույքի ներդրման դիմաց բնական գազով վճարումը կատարվում է «Հայգազարդ» պետական փակ բաժնետիրական ընկերությանը: Ներդրված գույքի դիմաց ստացված բնական գազի իրացման վայրը եւ գինը (բացի Հայաստանի Հանրապետության տարածքից) որոշում է Հայաստանի Հանրապետության կառավարությունը:

7. Հայաստանի Հանրապետության ֆինանսների եւ էկոնոմիկայի նախարարությանը, Հայաստանի Հանրապետության էներգետիկայի նախարարությանը եւ Հայաստանի Հանրապետության սեփականաշնորհման նախարարությանը՝ ապահովել սույն որոշման 3-րդ եւ 5-րդ կետով նախատեսված գործառույթների իրականացման հետ կապված հաշվապահական ձեւակերպումների աուդիտը:

8. Սույն որոշումն ուժի մեջ է մտնում 1998 թվականի սեպտեմբերի 18-ից: